

Visoki predstavnik spreman da napravi korake ka normaliziranju situacije u Mostaru



Na sastanku održanom danas sa predstavnicima sindikata iz Mostara, visoki predstavnik, Valentin Inzko, izjavio je da se u protekle dvije sedmice, uprkos obećanjima Gradskog vijeća, situacija u gradu dalje pogoršala.

Visoki predstavnik danas se sastao sa predstavnicima sindikata Zvonkom Stanićem i Emirom Topuzom te Milenkom Zovko iz vatrogasne jedinice Mostar.

“Situacija je sramotna. Vi ste radili svoj posao, dok vijećnici nisu radili svoj“, rekao je visoki predstavnik. „Sigurno je da nikada nisu bili u situaciji da hrane i oblače svoje porodice i plaćaju račune, a da nisu dobili plaću četiri mjeseca, zato plaće moraju biti isplaćene što je prije moguće“.

U posljednjih nekoliko mjeseci političke stranke u Gradskom vijeću “više su se bavile kritiziranjem nedostataka Statuta nego ozbiljnim političkim pregovorima“, rekao je visoki predstavnik. “Ovi izabrani predstavnici napravili su farsu od svojih funkcija i izdali su građane Mostara.”

Prije dvije sedmice Gradsko vijeće je usvojilo zaključak kojim

se obavezuje da će izabrati gradonačelnika i usvojiti budžet do 15. jula, te da će isplatiti sve neisplaćene plaće do 31. augusta. Taj zaključak nije realiziran.

“Način javnog glasanja za gradonačelnika unutar Gradskog vijeća Mostara očigledno ne daje rezultate”, rekao je visoki predstavnik Inzko. “Iako Gradsko vijeće nije prihvatilo metodu tajnog glasanja, činjenica je da Statut to zahtijeva”.

Visoki predstavnik Inzko će razgovarati o trenutnoj situaciji u Mostaru sa liderima političkih stranaka u posljednjem pokušaju da sami riješe mostarsku političku blokadu. Ako štrajkovi, javni protesti i mogućnost izbijanja socijalnih nemira ne pokrenu lidere tih političkih stranaka da preduzmu odgovarajuće mjere, onda možda nisu ni sposobni da odgovorno vode ovaj grad.